

Warbixin bukaanka kalaamiidiyada (2016-10-21)

Qoraalka dhakhtarada ka hortagga cudurada faafa.

Maxaa warbixintaan lagu siinayey?

Waxaad qaadday ama lagugu tuhunsan yahay cudurka kalaamiidiyada. Waxaa halkaan ku qoran warbixin ku saabsan kalaamiidiyada, sida loo daaweeyo iyo waxa lagaaga baahan yahay inaad samayso.

Waa maxay kalaamiidiya?

Kalaamiidiyada waxaa keena bakteeriyo badanaaba gasha xuubabka kaadimareenka, siilka, malawadka iyo jidiinka. Mararka qaarkood waxaa laga dareemi karaa jidiinka. Kalaamiidiyadu waxay jirka ku jiri kartaa muddo oo mararka qaarkood sanooyin badan iyadoo aan la dareemin.

Sidee loo kala qaadaa Kalaamiidiyada?

Kalaamiidiyada waxaa inta badan la isku qaadsiiyaa galmo aan la is-ilaalin, ha noqoto mid xubnaha galmada la iskala sameeyey ama mid futada ama mararka qaarkood afka la isticmaalo. Waxaa kaloo la isku qaabsiin karaa isa salaaxidda iyo qalabka galmada loo isticmaalo.

Kalaamiidiyada laguma kala qaado dharka iyo shukumaanada la isla isticmaalo ama musqusha la isla wadaago maadaama aysan bakteeriyadu ku badbaadi karin bannaanka jirka. Marar badan ayaa la qaadi karaa kalaamiidiya.

*Istiimin = “salaaxid dareen leh”, in la isa salaaxo iyadoo la isu galmoon, wadajir u seegeysi.

Ma la garan karaa in kalaamiidiya la qabo?

Dad badan oo cudurka qaada ma muujiyaan wax astaamo ah, micnaha ma gartaan inay infakshan qaadeen.

Qaar ayey kaadidu gubtaa.

Dumarka waxaa ka dareeri kara dhacaan dhiig wata iyo inay xanuun ka dareemaan gumaarka. Ragga dhacaan ayaa ka soo dareeraa kaadimareenka, xiniinyuhuna waa xanuunaan. Dhacaan ayaa ka soo dareeri kara futada haddii la iska la galmoodo.

Kalaamiidiyada waa la isqaabsiin karaa xataa haddii aysan astaamaheedu muuqan.

Ma khatar baa kalaamiidiyadu?

Haddaan laga daaweyn waxaa dumarka dhaawac ka soo gaari karaa ugxansidayaasha, taas oo keeni karta inay ku adkaato uurqaadidda ama ilmuhu ku abuurmo ilmagaaleenka bannaankiisa. Ragga infakshan ayaa ka geli kara kiishka shahwadda. Kalaamiidiya waxay kaloo sababi kartaa infakshan indhaha ku dhaca iyo xanuun kalagoysyada

Sidee loo daaweeyaa kalaamiidiyada?

Antibiyootiko ayaa kalaamiidiyada lagu daaweeyaa (kiniini). Infakshanka ayaa kaa baaba'aya haddaad kiniiniga u qaadato sida laguugu qoray oo aad raacdo talooyinka lagu siiyo.

Daaweyntu waa lacag la'aan.

Waa inaad waqtiga cusub oo lagu qabtay ku timaaddaa rugta qaabbilaadda.

Marka aad qabto kalaamiidiya, **waa in aadan khatar gelin oo aadan qaabsiin qof kale.** Habka ugu ammaansan waa in aadan qof galmo la samayn ilaa inta dhakhtarku ka caddeynayo inaad bogsootay, taas oo qaadan karta ilaa 10 maalmood. Haddiise aad dooneysa inaad qof galmo la sameyso, waxaa **khasab** kugu ah inaad qofkaas u sheegto inaad kalaamiidiya qabto oo aad isticmaasho wax celiya isu gudbinta (cinjir).

Dabagalka cudurka - maxay la micne tahay?

Aad ayey muhiim u tahay in la ogaado dadka qaba kalaamiidiyada si loo daaweeyo, si loo yareeyo khatarta dhaawac (eeg kor) ama in aan infakshankaas la qaadiin dad kale.

Haddaad qabto kalaamiidiya waa inaad u sheegtaa qofka cudurka baaraya dadka aad horay u la soo galmootay, mararka qaarkood ilaa sannad ka hor.

Waxa aad u sheegto qofka dabagalka ku samaynaya cudurka waa sir (sirta xirfadda). Qofka aad tahay loo ma sheegi doono dadka aad magacyadooda soo gudbiso. Waxaa keli ah oo loo sheegayaa inay ku khasban yihiin inay isbaaraan.

Kalaamiidiyadu waxay ku caddahay sharciga ka hortagga cudurada faafa - maxay la micne tahay?

Sharciga ka hortagga cudurada faafa waxaa ku cad habka looga hortegayo cudurada sida kalaamiidiyada si uusan ugu sii fidin dadka kale. Haddaad qabto ama lagugu tuhunsan yahay cudurka kalaamiidiyada, **waxaa khasab kugu ah inaad raacdo talada** dhakhtarkaaga.

- Waa inaad timaaddo booqashooyinka uu dhakhtarku mar dambe kuu qabto.
- Waa inaad qofka aad la galmooneyso u sheegtaa inaad qabto kalaamiidiya ama isku tuhunsan tahay.
- Inta ay daawadu kuu socoto waa inaad isticmaashaa wax aad isku ilaaliso sida cinjirka (kondom).

Haddaad u aragto in amar lagu siiyey uu qaldan yahay, waxaad kala xiriiri kartaa dhakhtarka ka hortagga cudurada faafa ee gobolkaaga.

Ma dooneysaa inaad ogaato wax dheeraad ah?

Warbixin dheeraad ah oo ku saabsan kalaamiidiyada waxaa laga helayaa:

www.1177.se

www.folkhalsomyndigheten.se

www.umo.se (barta internet ee qaabbilaadda dhallinyarada)